



陸子餘集卷第二

戴先生傳

戴先生諱泰字嶽宗世爲江西之永新人先生少穎異日記千言爲文援筆立就以家難避之襄陽襄陽人未之知也獨居敝廬中躬執爨滌旦暮手一編朗誦不絕口旁舍人窺見異之就問曰客何爲者自苦如是先生不應居久之士人有知之者延致之家爲塾師遂占籍襄陽補縣學生同輩見所業驚服稍稍從問難因折節爲弟子先生故治易諸爲易學者爭願從先生

游當是時先生名聞江漢間成化戊子薦湖南
魁其經辛丑禮部試中乙榜授蜀之南川教諭
地雜夷獠士鮮知學先生日夜親督教之數年
乃有領薦者調大足應聘考浙江鄉試稱得人
秩再滿乞致仕不待報輒去當道者強起之又
調金壇而先生自顧老矣益不樂亡何竟歸諸
生留之不得涕泣送之歸十年卒年八十二先
生性敦厚質直繼母性嚴事之以孝聞仕二十
餘歲不過校官所至未嘗以私干人自言吾無
過人者顧平生不能言利耳既老家赤貧服御

單陋有人所不堪者終不問產業所著述務以
理勝嘗教學者屬文當先治心無徒支離其辭
爲也君子以爲知言先生之先本蕭氏元季有
宗濂者爲廬陵判簿當天下一亂糾義旅捍鄉社
高帝聞其名召授節鉞不屈死金陵市中至
其孫爲戴氏甥因冒姓戴至今自判簿以節死
鄉人高之其後子孫寔顯若代長史禮蜀伴讀
弼汀州守禧及先生皆起科目爲名人先生子
梧今嘉善令忠信好脩世其家
陸粲曰余聞之太史遷言漢祖滅項氏令諸故

項籍臣皆名籍獨鄭君不奉詔被逐死至其子莊官九卿諸孫爲二千石者六七人今觀判簿之死偉矣其後世貴盛略與鄭氏等天於忠義之報固有意哉梧與余同進士舉相善求傳其父平生得判簿死事因附著云

陸義姑姊傳

陸義姑姊者吳郡陸粲之姊也婉嫵有識鑒歸蔣氏而寡其弟粲舉進士爲給事中疎戇好言事一歲中章十餘上數譏彈用事者過惡竟以是得罪謫西南夷徼外地荒遠不能以家從粲

旣行數月而其妻病沒有一男一女皆幼母胡夫人老且失明方悲號嘯天莫知爲計姊聞之曰嘻此吾責也顧其子曰善視而室吾往與二雛俱存亡矣亟走第舍抱持其男若女以泣日撫視之且教以學書記及女紅恩意甚篤男若女皆忘其母之沒也他日粲得稍遷爲縣令過家戀戀不能別姊曰行矣有而姊在何憂粲亦遂慨然辭去不復顧家曰有吾姊在何憂久之粲致事歸其男若女則皆長矣姊又日爲縫紉衣被飭治奩具視畢婚嫁乃辭去復從其子以

居於是吳之大夫士凡與粲兄弟友者聞之莫不高賢姊之行曰昔者魯婦人遭亂舍己子而存兄子時號魯義姑姑姊今姊行足追配若人宜遂曰陸義姑姑姊云或曰姊其有所聞而興起者歟姊未嘗學問顧自其少時喜從諸弟說史傳故實及覽稗官小說至古人壯節事輒拊手稱善爲吟誦不釋口夫其嗜義也固天性然耶然姊居貧足不出閭閻又其諸弟及子皆賤士不能藉交於四方之賢豪長者以談說游揚其名故姊之事獨其鄉人知之耳令世有良史如劉

中壘者錄寘之列女傳中安知不與魯義姑姑姊者並傳也雖然姊之始願則豈爲區區之名哉於是姊年且六十其弟粲將率其男若女往爲壽而書其事以視之曰俾爾後之人無忘焉作陸義姑姑傳

給事中李公傳

給事中李公者大梁之祥符人也名潑字宗禹一字原潔其先自燕來居大梁世有顯人稱衣冠家公早孤力學被選爲校官弟子員美鬚眉儀觀豐偉好侗儻大節舉成化辛丑進士久之

拜南京戶科給事中會 敬皇帝初即位是歲
六月朔日有食之公上疏勸 上飭躬脩政以
銷弭變異因陳慎始保終之戒 上嘉納焉都
民當供雜調者其高貲富人大抵爲貴勢家私
役而官中百需特倚辦下戶公令所司覈實而
均其征有挾私干請者痛斥絕之於是宿弊盡
蠲上下稱便中貴錢能素饜諛時典留鑰兄弟
爲姦利暴橫都城中公奏劾其罪狀又論刑臣
不宜干紀與政辭指尤峻切用事者怒俄有盜
取土於 孝陵壩中者公廉得其主名以聞用

事者因指擿以爲誣罔非所宜言有 詔鐫一
階補肥鄉丞肥鄉小邑去京師差近朝貴往來
境上每有所發取守令不能距違公至則一切
裁之以法其後遂莫敢妄求皆曰無撓彼彊項
丞爲也是時左降官多簡傲不省事獨公盡心
吏職推情與下先諭教而後笞罰民大信愛之
惟恐其去也一日集數百人走 闕下上書言
願從 明天子乞李丞惠養小民書報聞而公
以母憂歸矣比終喪年纔五十餘遂無仕進意
家居日夕手一編絕跡公府部使者以下造門

不輒見既見語不及私所居湫隘或請更諸爽
塏者謝曰先人安焉余不足以嗣之余保此足
矣巡撫都御史孫需陶琰先後列薦于朝使
郡守丞即其家勸之復出譬說良苦公弗應既
而拊心笑曰此中乃堅過於石何可轉也因署
所居曰石菴以著其志中貴廖鏜鎮守河南勢
張甚蔑視士大夫獨心敬公間爲具召之時賓
客滿坐待公舉酒公不得已彊往酒一再行即
據席睡大鼾鏜慙顧左右曰李公老人也不勝
梧杓矣少選公起拭目理髯長揖徑去鏜爲罔

然自失自是不復召也論者儼之宋廣平待王
毛仲事云素輕財居官所得俸祿悉分遺族人
未嘗營立產業既老益貧常飯脫粟猶時時弗
繼獨居一室土牀葦蓆而已然無不足之色遇
良日乘小車從子姓出游茂林廣野靡所不之
意欣然樂也正德癸酉年七十一乃終公善書
所爲詩文皆有思致今存者若干首

陸子曰班固書稱朱雲著節漢廷後不復仕常
居鄠田時乘牛車游衍自適雖宰相欲延致之
東閣弗屑也余觀李公仕盛明之朝數上書

顯譏貴勢亦矯矯壯激矣其謫也非 上意令
異時復起必且馴致大官乃泯迹里閭優繇終
老遭有力者相援而執志弗變方諸槐里令屈
疆衰世者雖所遇不同然風操則髣髴似之矣
抑吾聞馬文淵有言凡人既貴當使可復賤也
今之仕者一日去其官即愁沮喪志如魚失水
喁喁然死耳若李公者食貧不悔爲人所難所
謂可使復賤者非邪公子世德爲禮部郎坐小
法謫吳邑博士間述公行實視余余爲列其大
者以傳

前樂安令顧先生壽藏銘

先生姓顧氏名蘭字榮甫其先家吳之香山

國初始遷郡城臨頓里今爲里人父倫母薛氏
先生少則儁朗不群未冠已博綜群籍補長洲
學生弘治戊午占應天府鄉薦累試禮部不第
正德丁丑謁選得山東淄川令淄川小邑而賦
役繁重富人子大抵出貲爲省府掾以黃緣規
免先生按籍鉤考令諸科謫一視資產爲差吏
徒抱案受署不能有所前却上官聞爲下其法
於旁郡邑行之無弗稱便他雜調爲民病者一

切放罷邑故有鄭康成祠久廢亟爲繕治率學
官弟子以時行祀事毀僧尼廬即其故址作社
學簡少俊立師教之民駸駸嚮化俄改知江西
之樂安樂安俗尤靡薄人死泥堪輿家言積十
餘歲不葬子弟未冠而婚女婦夫死不持服輒
嫁先生以禮風曉其士民且白監司嚴設科禁
俗用丕變里胥豪奪鄉民不令受事先生察其
利病爲參停均適當使孤遠者得所民喜相傳
告自山谷爭出應役長老驚歎以爲數十年來
所未有也是時輩類爲州縣者多超取顯美先

生治兩邑更七八年以不能樹援當路故名秩
不進而其意亦已倦游因力請致事以歸時年
才逾五十耳所蘊蓄蓋什不一試談者至今惜
之先生受性介潔自爲舉子抗志食貧不苟取
予或要與俱請事於官曰不能少屈意以自潤
耶先生不應拂衣徑去其人慚語人曰是子固
狷士也居官益自矢清白自淄川入覲單車上
道囊空無一錢父老爲率邑中得數十緡以獻
竟賦詩卻之樂安民長鄉賦者歲餉令五百金
先生亦峻謝焉比歸足不入公府所居委巷中

有小圃雜蒔花木果蔬培壅灌沃勤而適時久之皆蔚然成林日徜徉嘯咏其間不一問世事喜讀書每得一編披玩不暫去手間爲小詩辭致清婉亦善繪事而不輕作早歲頗少容晚更夷曠與客談讌常雍容款洽雖率然啁笑亦雋永有味云粲與先生同里居爲後進亦以仕齟齬早退而骯髒寡諧意獨親先生先生亦折輩行與交時時相過從輒解衣槃礴竟日語笑飲酒相樂也至是自治壽藏於白蓮涇之世墓語粲曰吾年過七十旦暮從先人於是子爲吾銘

庶吾猶及見之也先生故所與游最善者文內翰徵仲徵仲爲著傳擬之陶元亮當世以爲知言銘曰望其外臯如即其中廓如是維先生歸全之區俛後百年乘化以徂有知德者過其下尚曰此古獨行士之墓也而式諸乎

一蘭陳翁壽藏銘

一蘭翁作壽藏橫山下語其子曉曰吾老無所覬慕獨念欲得當世之君子有道而能文者銘吾斯藏吾庶以是不朽矣小子盍圖之於是曉詣余告曰是莫宜子者因出所著事狀再拜以

請余不得辭也爲最其略而書焉翁名綱字宗
憲姓陳氏世吳人大父本仕爲蜀羅江教諭子
姓從宦學者因占數漢州以便進取父昌太學
生母水氏兄經中蜀省鄉試高等翁生州之寓
舍幼岐嶷不凡從其父兄受尚書若毛氏詩輒
了大義旣而隨父謁選京師道出華陰父暴病
死逆旅中逆旅人不聽殯將野塋之翁長跼哀
號竟得成殮潛丐縣令護其喪間關達蜀翁時
年十有五歲旣壯乃克奉其母以父喪歸吳葬
焉家儲無擔石所親有哀其貧者頗調給之始

出從事貿易久之足跡殆徧天下常經涉險阻
瀕危而濟一日慨然曰奉先人遺體數履畏途
以微尺寸王陽獨何人哉自是不復出取故所
讀書稍尋繹之里中人爭迎致爲子弟師蓋翁
雖嘗服賈而其韻度固蔚然儒者也居家孝友
念其父客死言輒灑泣養母極滋味每食必親
省具乃進諸兄弟前卒者爲收恤孤嫠咸令得
所族子以罪戍邊翁爲所註累盡喪其資無幾
微見顏色平生非其義弗苟取嘗適濟南有素
丞者寓以百金道遇盜從者迸散翁獨彎弓射

盜却之或說使匿其金曰第以盜為辭足矣翁不聽卒歸之他事多類此翁生天順壬午正月四日今年七十有九而聰明不衰娶蘇氏子男二人長曉縣學生次晴先卒女一人惟陳之先蓋有隱德學諭君尤稱篤行壽且百歲至翁起孤童奮自樹立雖食貧以老而不隕厥問殆難能也已曉方發藻儒林有祿養之望焉天之報翁將在是乎始翁嘗讀琴史至猗蘭操意若有感焉者故自號一蘭余為銘以著其志銘曰蘭生幽遐蹇獨芳兮弗紉而佩亦何傷兮有美

若翁庸比德兮其胤則嘉秀而碩兮終為國香媚于后兮干祿百福用滋茂兮君子刻銘播厥芬兮後千百祀其永有聞兮

福濟觀重建呂純陽祠碑銘

福濟觀建呂僊純陽祠蓋成化中道士郭宗衡始為之而武功徐公記其事云夫神僊窈惚不可知然觀王大猷所遇則又甚顯妙化玄蹟龍升霞顧孰能測識之哉余嘗聞純陽舉進士不第棄去遂學為僊是以乘三光遊帝庭為可致而土苴文章芻狗富貴視吾儒之論著琬琰勳

勒鼎彝者果不足尚乎然真風靈惠又往往足以濟世而福民是故神明之異既生人之別造也嘉靖甲申呂祠火道士周北山再建焉棟宇鮮勝丹堊互照中設僊像旁翼隆廡洞門神室鬱然雲開於是復爲真境矣北山名以昂少學道獨扣玄宗洞究至理其閒神曠思條然塵外而世之文章富貴舉無以溷其中然又慕儒行習孝友之綱敦禮義之節爲時所重又嘗與高逸者遊詩酒彌日樂而忘倦然問以神僊事則默且笑嗚呼是誠窈惚不可知邪抑有之而顧

難測識邪若北山可謂學道而有得者矣祠成請銘於余余未暇也蓋又十餘年始克爲之其辭曰 閶闔東裊虹橋西絡真苑崇開新宮載作神居鸞峙靈堂虎躍雲構高翔天工巧削雄柱含虬文題引鶴日抱璇梁霞流竝閣邃宇芝成洞房綺錯采組周廊麗張夏幕銀榜初輝金函迺託館伏蒼龍門呵朱雀星攀桂戶風搖蘭薄蔽檻千禽翻階萬萼絳府嵯峨玄蹤綽約龍駟天行螭衣霧落鳳銜紅節鱗吹紫鍔瓊女鳴簫玉童捧勺來往太清逍遙真樂祥光一臨仁

飈四廓福溥下民惠同上藥極壽乾坤永標丹
獲

雲南按察司經歷劉紹卿墓表

紹卿自太學生得按察司經歷銓注雲南先是
余以給事中言事謫貴州都勻驛丞雲貴接壤
皆古西南夷地貴州地尤瘠惡非人所居余行
數月乃至境上屬盛夏暑雨所經由皆大山長
坂下上勞憊盡日道無行人俄有騎而自後至
者紹卿也與俱憇坐林樾間語相勞苦仰視山
兩崖斗絕數百千丈色如積鐵霧氣淙淙起山

巔虎跡交錯道上紹卿憮然不樂余顧笑曰子
悔來耶丈夫不經此當何由知艱難子行矣紹
卿亦笑且頷之上馬去余至都勻會驛舍久廢
僦居平越平越者雲貴往來孔道也諸自雲南
來者時時傳說有新官劉經歷彊執不受請託
蠻酋武官放恣淫虐不畏大官府獨難劉經歷
耳余聞之良喜自余去平越及歸吳中三四年
間與紹卿不相聞既而紹卿上計京師自巡撫
大臣而下署其考爲諸幕官最當遷秩矣迺有
飛語聞吏部於是以不謹罷則聞有按察官以

細故相恨望實陰中之云紹卿自失官家居十
餘年病卒卒後若干月且葬其子城詣余泣請
表墓余許諾因爲道往時事曰吾知若父久矣
忍無以慰其死哉紹卿諱某先世家臨江國
朝有編戍蘇衛者今爲蘇人自其從祖父刑部
尚書與清始起進士至大官父某母某氏紹卿
生有至性十四喪父執喪循禮而力學工書事
母以孝聞在雲南涖政明決上官才之事多倚
成焉數平亭疑獄上官楊訓殺人帥府桀黠奴
高壁亦坐事當謫戍兩人要重貨投之不納卒

案致如律千戶胡學詩戍其妻行賕要人脫罪
一訊得實狀論死王髯者圍奪殺人道中郡吏
名捕之一兵官子亦王姓而髯疑懼自髡爲吏
所錄旣誣服成獄矣紹卿往覆案立得殺人者
而出兵官子歲饑督視平糶計會詳密而賦授
必均民以不殍死閱視迤東諸郡庾積姦蠹爲
清他所建易尚多不悉紀令任職差久其功緒
當益有可觀者顧僅逾一考輒以晻昧之過去
談者惜之或曰紹卿平生剛急少醞藉用此觸
忤貴人卒見廢退斯自取之也非耶余謂不然

夫仕在不失己耳乃禍福則有不可知者昔人有言祗繫其逢不繫巧愚信矣今世仕者或工於語言日蒲伏公卿戶下拜起候望顏色然其人固自有利不利利則躡取華要不利則亦放棄留落死耳要之榮達有定分非必以諂傲爲通塞也如紹卿輩蒙垢泯默以終者世亦何可勝道哉紹卿之卒以嘉靖丙午四月九日年五十二其葬處曰靈巖鄉桃花塢室人郭氏余族姑之夫之女也一子即城吳縣學生秀敏有文世其家

陸子餘集卷第二

程